


徐氏筆精


終七之八




			九	漢
		七	七	書
	四	二	〇	門
冊	架	函	號	類


庫文閣内			
〇	九	漢	
七	七	書	
函	〇		
一	二		
架	冊	號	類

内閣文庫		
番號	漢	9702
冊數	4 ( 4 )	
函號	307	172





徐氏筆精卷之七



文事載籍碑版書學六十一則

孟子

孟子門人見於書者十七人皆配享他無考

帝王好書

歷代帝王皆好典籍秦火為萬古罪人無論已

淺草文庫

漢興除挾書律廣開獻書之路景帝募求天下遺書藏之秘府武帝建藏書之策置寫書之官成帝使謁者陳農求天下遺書詔劉向等校定光武入洛書二千餘輛後于東觀廣集新書命班固等讐校明帝大會諸儒于白虎觀攷訂群籍靈帝詔諸儒正定五經刊石魏道武命郡縣大收書籍悉送平城隋文帝遣使四方搜討異本每書一卷賞絹一疋煬帝觀文殿構甲乙丙下書屋唐貞觀中魏徵虞世南顏師古請購天

下書選五品以上子孫繕寫藏內庫玄宗幸東都議借民間異本傳錄以千錢購書一卷後唐莊宗募民獻書及三百卷者授以官銜明宗令國子監校定九經雕印賣之周世宗銳意求訪凡獻書者悉加優賜宋太宗下詔購募亡書分置書府涉弼等並賜科名太宗構崇文院以藏書籍分經史子集四庫仁宗詔中外士庶上館閣圖書每一卷支絹一疋五百卷與文資官徽宗詔郡縣訪求秘書勅教張頤進二百二十餘

卷賜進士出身李東一百六十卷補迪功郎高  
宗南渡獻書有賞元世祖遣使取在官書籍版  
刻至京師我太祖定鼎之後極重儒臣詔纂  
國家切要之書成祖詔脩永樂大典一時  
儒臣畢集天下賢才聘辟無筭凡南京文淵閣  
所貯古今一切書各取一部送京以後則杳無  
求書之令矣國家事可侔前代獨好文之<sub>主</sub>更  
稍遜

藏書

海鹽姚叔祥有言今藏書家知秘惜為藏不知  
傳布為藏何者秘惜則緗橐中自有不可知之  
秦劫傳布則毫楮間自有遞相傳之神理然所  
謂不知傳布之說有四大抵先正立言有一時  
怒而百世與者則子孫為門戶計而不教傳鬪  
竒炫博樂于我知人不知則實秘自好而不肯  
傳卷軸相假無復補壞刊謬而獸踵還癡一嘖  
則慮借抄而不樂傳舊刻精整或手書妍妙則  
懼翻摹致損而不忍傳凡此四不傳者彼繇不

知世變靡常聚必有散一旦三災橫起流爛滅  
沒無論藏者且累著作姓名一併抹煞是藏有  
加于亡何必後來信信詈祖龍為也

又

吾鄉前輩藏書富者馬恭敏公森陳方伯公暹  
馬公季子能讀能守陳公後昆寢微則散如雲  
烟矣又林方伯公懋和王太史公應鍾亦喜聚  
書捐館未幾書盡亡失然四公之書咸有朱黃  
批點句讀余間得之不啻拱璧也予友鄧泰知

原岳謝方伯肇淵曹觀察學佺皆有書嗜鄧則  
裝潢齊整觸手如新謝則銳意蒐羅不施批點  
曹則丹鉛滿卷枕藉沈酣三君各自有癖然多  
得秘本則三君又不能窺予藩籬也

楊文貞積書

楊文貞公士奇文籍志序云吾先世藏書數萬  
卷元季悉燬于兵吾早有志于學而孤貧不能  
得書稍長事鈔錄無以為楮筆之費則徃徃從  
人借讀不能數得年十四五出教童蒙頗有所

入以供養不暇市書也。弱冠稍遠出授徒所入頗厚。始蓄書不能多也。及仕于朝有常祿。又時有賜賚。節縮百費。日月積之。一爲收書之資。歷十餘年。經史子集。雖不能備。頗有所蓄。視吾先世所藏。千百之什一。視吾少時。可謂富矣。夫人於其所好。勞心苦力以求得之。必將謹護珍襲。不至于廢壞。建傳其後之人。未嘗知得之之難。盖有視之漠然。不以留意。棄之如棄瓦礫者矣。吾懼後之人不知守也。凡書其志。吾之所以得。

而勉其所以守。盖昔人愛一草一木。猶戒子孫以勿壞。矧書籍聖賢至訓之所寓乎。敬之哉。文貞公勲業名位冠于國。初賜賚祿入。積爲收書之費。足見先輩雅尚。

楊文貞母

楊文貞公士奇少孤貧。十六歲出爲村落童子師。欲買史畧二冊。百錢不能得。其母夫人畜一牝雞。數歲命以易之。世有此母。安得不生此子。

書城

宋李德茂環積墳籍名曰書城予友邵武謝北  
申好書盡罄家貲而買墳籍兀坐一室四面皆  
書僅容一身宋世版本未盛恐李公未必如此  
之富予與謝君極稱臭味交謝君藏蓄幾盈五  
六萬卷又多秘冊合八郡一州未有能勝之者  
不歎古人書城書窟書倉書岩爲奇耳

保守書籍

世之蓄田產屋宇多者子孫稍賢必保守不失  
何也可以資衣食不匱也蓄尊罍彝鼎多者子

孫稍賢亦保守不失何也可以資耳目近玩也  
惟蓄書籍圖畫多者子孫雖賢未必保守不失  
何也非深知篤好者鮮不屑越也余見保產業  
之家多至六七代而保書籍者不過一二代耳  
然保之法當較之田產屋宇尤加嚴密庶幾之  
歷四五代也唐末吳人徐脩矩世守書籍萬卷  
皮日休常就借讀日休詩云保茲萬卷書守慎  
如羈紲陸龜蒙詩云吾聞徐氏子奕世皆才賢  
因之遺孫謀不在黃金錢若才賢不至奕世守

慎不如羈紲。非所以論保守也。

### 聚書十難

陳貞鉉曰。聚書有十難。學每淵源一難也。家少承書二難也。不生通都大邑三難也。乏慧鑒四難也。隋唐以上書不多見五難也。攜帶跋涉易致觸損六難也。換曝之勞病干夏畦七難也。近無善本校讐斯苦八難也。家貧購書九難也。片時不閱便供蛀蟲十難也。夫聚必有散。物理之常。念此十難。皆好彌篤。余嘗言曰。田宅易購。羨

書難逢。緣不相值。竒秘終蘊。昔杜暹藏書。每題跋尾曰。請俸買來。手自校讐。及借人爲不孝言。雖未大。亦自痛切矣。

### 觀書三益

陳貞鉉曰。客來觀書。病懶時頗厭其煩。然有三益。不可以厭煩而廢。賤性善忘。經目輒忽。獨對客搜尋之事。雖閱年能記一益也。覽所不及。度床便蠹。因客披搜二益也。習懶成病。偶因客至。整書忘疲。亦古人運甕之意。三益也。夫學求益



也。一益尚可。況三益乎。

### 讀書樂

余嘗謂人生之樂莫過閉戶讀書。得一僻書識一奇字。遇一異事。見一佳句。不覺踴躍。雖絲竹滿前。綺羅盈目。不足踰其快也。六一公有云。至哉天下樂。終日在几案。余友陳履吉云。居常每事飽暖。讀古人書。卽人間三島皆肯哉言也。

### 四觀

友人陳貞鉉曰。室廬雖陋。取足庇身。况有架書

之所。作廣廈觀。薄田自供。取足糊口。况稟淡薄之訓。作京坻觀。擁書萬卷。取足娛志。况嗜彝鼎之玩。作極樂觀。城居習懶。取足鎮喧。况耽禪室之趣。作清淨觀。

### 借書

陳貞鉉曰。古人衣裘與敝。書不借人。則疑于不廣。非不廣也。置書之勞。不畢世不已。借書之敬。多致遺亡。點汗則其掛懷。不至於再置不已。使書可再置。抑又何嫌。間或重帙善本抄篇集函。

非通都大邑不購。非良緣奇遇不值。非閱年積  
時不成。偶欲披閱。或方借而未還。或已借而既  
失。至于撫卷痛恨。不如不借之為愈也。客曰。如  
是書終不借人乎。居士曰。書亦何可不借人。也。  
賢哲著述。以俟知者。其人以借書來。是與書相  
知也。與書相知者。則亦與吾相知也。何可不借  
來借者。或蓄疑難。或稽異同。或補遺簡。或搜奇  
秘。至則少坐。供茶畢。然後設几。持帙。恣所觀覽。  
隨其抄謄。請主客無相妨。尋常供具。不為漆設。

絕不置酒。恐緣酒而狼戾。書快如是。或竟日。夫  
或數日。或十數日。予俱不厭。客亦無猜。若欲以  
丰部一函。持借出門。僕已具觴酌。誓于大聖大  
賢之前。斷不爾。人各有願。幸毋相強。

贈遺待人

宋虞世和甫。最愛黃庭堅。每得佳墨精紙奇玩。  
必歸魯直。國初王羽儀之。最善楊士奇。楊喜收  
書。或數月不相見。相見輒贈一書。皆贈遺得人  
者也。

秘書

蔡邕秘論衡于帳中或搜得之輒抱以去又家  
有書萬卷末年載數車與王粲何私一論衡而  
萬卷不之惜耶蓋搜得論衡者未必為邕意中  
人固宜珍秘而仲宣素有異才即捐數車之與  
不為傷惠要在得其當耳今世以書為羔雁連  
篇累牘贈送貴人貴人全不知惜膏蠹飼鼠予  
者非邕受者非粲徒為典籍一厄與其為貴人  
屑越寧秘帳中

異書

余嘗語曹能始云有異人其家必有異書常人  
之家必有常書俗人之家無書矣欲求異書先  
求異人不遇異人勿問異書

書不雙言校

北齊書邢子才有書甚多而不甚雙言校見人校  
書常笑曰何愚之甚天下書至死讀不可遍焉  
能始復校此且誤書余嘗披覽抄本之書十訛  
二三難以句讀令人燥熱又無處借書校對偶

及邪事心神頓涼

兩脚書厨

永樂中毘陵陳濟善記書文廟謂為兩脚書厨  
古人號書厨者有矣此云兩脚文皇亦善諧諢  
也

博物

史稱張華博物識劍識狸及著博物志信矣然  
左傳引叔向之言曰子產博物君子也又曰延  
陵季子閱覽博物君子也然子產季子不以博

物名惟張華為著

讀書飲酒

謝少連云讀書須少年僻地靜夜早晨阮堅之  
云飲酒須淡酒小杯細談久坐二君得讀書飲  
酒之趣可謂名言

痛飲讀離騷

離騷悲憤令人讀之不歡故昔人有云痛飲讀  
離騷蓋醉而後讀始不為鬱惋幽憂之氣所擾  
耳曹孟德云惟有杜康可以解憂正此意也

囊螢

隋煬帝宮中囊螢為戲車胤無油囊螢讀書下  
朱崖囊螢當火恐熱氣蒸人同一螢火而所用  
苦樂迥別

書畫碑版

陳眉公云見古人書畫如見家譜豈容更落他  
人手見古人墟墓碑版如見先壟間物豈容更  
落樵采不呵護名言也

趙家書畫

趙文敏善書畫而妻管夫人子雍彙弟孟顓孫  
鳳麟甥王蒙皆以書名于時惟彙以書名不聞  
能畫

吳興三絕

元季吳興馮應斜筆與趙子昂字錢舜舉畫稱  
三絕

瓦官秘藏

南部烟花錄得之瓦官寺廢閣王右軍告誓文  
真蹟亦得之瓦官寺鳩吻內竹筒中何此寺之

多秘藏也。豈支許輩所留耶。

書法 以下書學

六一居士筆說云。古人皆能書。獨其人之賢者。遂傳遠。後世不推此。但務於書。不知工於書。隨與紙墨。紙棄者。不可勝數也。使顏魯公書。雖不佳。後世見之。必寶也。又云。學書當自成一家之體。其摹倣他人。謂之奴書。今人肉眼妄評某人書。酷肖某帖。不論其人之賢否。正蹈六一居士之誦耳鳴乎。此但可與知者道也。

### 古書古帖

養生家云。目不醫。不瞎耳。不挖。不聾。予喜蓄古書古帖。嘗語人云。書不裝。不蛀。帖不裱。不蟲。邇來書板極善。但一加外函。不久生蟬。藏書家須急去之。勿惜也。

### 八分書

子美李潮八分小篆歌云。尚書韓擇木。騎曹蔡有鄰。開元以來數八分。潮也。奄有二子成三人。然此三人書皆不傳。

扇書杜詩

宋高宗紹興元年賜經筵官扇皆取杜甫詩句  
親書與之賜學士王綯曰霖雨思賢佐丹青憶  
老臣賜尚書胡直孺曰文物多師古朝廷半老  
儒賜舍人胡文曰相門韋氏在經術漢臣須高  
宗之光寵儒臣如此

四十二章經

錢塘六和塔上刻四十二章經乃紹興中諸名  
臣分寫者沈該湯思退陳誠之陳康伯王綸賀

允中葉義問楊椿周麟之洪遵楊傑沈介趙令  
諤孫道夫王希亮黃祖舜張孝祥宋棊金安節  
董革李洪錢端禮張宗元張運楊朴莫濛路彬  
張庭實周操葉謙亨胡沂陳俊卿鮑彪陳棠楊  
邦弼張洙黃子淳楊俟沈樞韓彥直虞允文洪  
邁共四十二人皆以官爵序次字俱生硬無晉  
人筆法蓋此四十二人無一人以書名者也惟  
錢端禮虞允文差勝耳

僧善書

隋唐善書僧三人智永懷素高閑也。智永懷素今墨本紛紛摹刻，惟高閑妙傳。

戲魚堂帖

宋劉次莊謫居臨江，卜築鑿池東山，自摹淳化帖十卷刻石置堂中，時稱戲魚堂帖。今在新淦縣東山寺前。

寶晉齋

朱元章守無為州，治東北建寶晉齋，有法書州碑刻立壁間，因名。

鄭回溪父子書學

宋乾道五年狀元鄭僑本永福人家，與興化隣。後寓莆中，淳熙間使金，不屈，官至參知政事，著書衡三篇，號回溪，善行草書。其子寅官至樞密承旨，著包蒙七卷，號肯亭，亦善書。二公書名不顯，著作無傳。近見元人鄭灼所傳衍極專論字學，多引述之，而其論書亦博綜今古，惜無全文耳。



宋鄭昂字尚明號董山祭酒鄭穆之孫也作書  
史起伏義終五代凡二十五卷今軼弗傳昂善  
書九仙山蓬萊峰盤石上有題名徑尺許古勁  
絕倫昂所書也

陳述古書

吾閩古靈先生陳述古書法在蔡君謨之右學  
柳誠懸酷肖也烏石山平遠臺鼓山臥龍山俱  
有題名鐫之石壁皆徑五寸鮮有知其妙者

寺額名書

衍極載元人陳旅題署書記畧中一段云閩中  
風俗以正月六日游烏石山寺其外大父趙大  
蓬指寺額曰是古題署法書也古時人人知有  
是法王公貴人有所建立不能書不書必求能  
書者雖微賤必書也紹興後無論能否官大郎  
書一時迎合爭乞新題易舊榜于今存者什之  
一耳米南宮黃太史非不爽峭可喜直可施之  
亭榭宴遊處唐以來惟顏太師雄秀而題署李  
北海為最云

古磚

抗吳山萬曆乙巳年里人建水神廟于上奠礎日豐草中的饒有光視之則古廢磚方二寸許上有安寧萬姓四字類蘇長公筆法今在廟中

中元大鵬年號

先輩陳中丞達嘗于荒莽得石盆甚巨背刻中元庚申僧木茲造八字按中元乃光武年號光武無庚申庚申乃明帝之永平三年也今石盆尚存近余友林熙工掘地得古磚刻大鵬二年

大鵬年號無攷書之以質博雅者

古鏡

餘姚孫忠烈公初巡撫至江西治廨舍得古鏡于深溝中背刻其文曰光運忠扶日月心感天揚眼忠獨難塞天不世內靖斯以昭明字畫奇恠觀者多不識後孫公死好古者以意辨之其文乃著

銅鼎

嘉靖初海虞王澄嘗獲一鼎其識曰維紹興丙

寅三月己丑太師秦公檜一德協濟配茲乾坤  
乃作剝鼎賜家廟以奉時祀子孫其永保是高  
宗所賜檜之所受者澄鄙其妄乃卽家山作萬  
松樓祀岳武穆而以鼎奉焉黃云以秦鼎祀岳  
恐岳未必饗也

西園雅集

以下畫

坡

宋駙馬王訖晉卿延東坡諸名流當時李伯時  
寫為圖今世遞相傳摹歲月既無所攷西園亦  
莫究何在然其人米元章有圍序甚詳國初黃  
文獻楊文敏林尚默各有攷按儒衣冠十四人

蘇東坡王晉卿張文潛蔡天啓李伯時蘇子由  
東魯直陳無已李端叔晁無咎米元章王仲至  
劉巨渺秦少游也釋道各一人僧圓通道士陳  
碧虛也侍女二人晉卿家妓雲英春鶯也

唐文皇像

余嘗見閭立本寫文皇御容絹素僅尺許虬髯  
鳳目神彩煥發傍署云臣閭立本寫今藏薛中  
丞家

宋太祖像

先伯兄舊有趙文敏寫太祖真像擊球圖桑皮  
紙游絲金筆潤僅尺餘今在泉南丁司寇家

### 膠山絹海

古畫多用膠礬着絹唐宋名家皆然惟元倪瓚  
輩始喜寫生脫畫家蹊徑唐章孝標咏畫扇風  
云雨滴膠山斷風吹絹海秋唐宋畫全用膠礬  
此是一證

### 古碑 以下碑版

三代碑刻至今存于世者唯岫嶠高碑與周石

鼓文耳秦則李斯斷碑僅二十九字漢蔡邕石  
經與孔廟中郎碑陳思王碑蜀有樊<sup>樊</sup>侯碑餘俱  
不可覓

### 曹娥碑

曹娥江在浙之上虞當時孫權按越不知孟德  
何因與楊脩至江許讀其碑也殷芸小說云蔡  
邕刻曹娥碑傍曰黃絹幼婦外孫蓋白魏武見  
不能曉以問群僚莫有知者婦人浣于江渚有  
曰第四車中人解之乃禰正平便以離合解為

絕妙好辭此說與諸書所載大異余謂孟德決  
無到曹江之理或是當時傳印那郭淳曹娥碑  
文而孟德與楊脩猜度之只見墨本非親摩碑  
石也補衡之解又不知何據語林云操讀碑於  
汝南其為摹本無疑

### 泰山碑刻

泰山秦碑李斯篆在秦觀東廳壁僅存數字唐  
摩崖碑隸字在岳神祠後為苔蝕其半李白遊  
泰山詩六章篆刻方石豎會真宮東廡

### 無字碑

泰山頂有秦無字碑唐武后乾陵亦有無字碑  
蓋碑緣文而立而無字誠不可曉

### 番君碑

饒別番君廟碑趙文敏書厚七八寸文敏在京  
郡人欲乞其書碑重不可載乃鋸其碑面寸許  
載至京文敏書畢仍合堅之予至饒見其合縫  
宛然昔人之好事如此書法道勁因榻數紙以

歸

畫錦堂碑

姑蘇志云國初陳僖敏公治宅吳城蘭地得蔡君謨所書畫錦堂石碑按畫錦堂在相州君謨所書碑字甚鉅何因得至蘓州歐陽文集中言書碑事甚詳詳未聞有兩書者豈後人重君謨筆法重摹刻之如今之閭門翻刻法帖碑本之例決非宋碑也

武夷唐刻

武夷三十六峰題刻甚多而唐刻絕少舊傳幔

亭峰下唐明皇遣使祀仙刻大唐天寶七載歲在戊子七月封名山大川登仕郎顏行之記共二十四字今不可覓或云石墜水中安也

虎渡橋碑

漳州江東驛虎渡橋左有碑巍然是宋淳祐中狀元黃朴撰文併書字法全類柳誠懸石材完好惟篆首缺墜耳余以癸卯冬與曹能始觀賞各搨一通第鄉人不知重無有覆瓦為亭者惜哉

碑厄

水經注洛陽天淵泚中有魏文帝九花樓殿基  
悉是洛中故碑累之澠水閒談云景祐初姜遵  
奉太后意悉取長安碑石為塔材道山清話云  
天聖中詔營浮圖姜遵在永興毀漢唐碑之堅  
好者以代磚甃國朝太祖登基金陵悉取六  
朝舊碑砌作御道唐歐陽詹集云九江有祖將  
軍廟碑顏直鄉撰文并書後州吏有脩坏之務  
狀其末蹟刻磨舊文詹作文以弔之平淮西碑

先琢韓退之而刻段文昌宋郡守陳某又琢段  
文更刻韓文一石遂遭兩厄湖州天聖寺趙孟  
頊撰書錯盤龍碑記國初昇入郡治作太守去  
思碑歐陽公金石錄所收古刻十卷今什不得  
一二皆遭此數厄耳

黨籍碑重刻

元祐黨籍碑蔡京欲傳示後世使其子孫有餘  
辱也弘治中吳興沈暉以其祖沈千名與涑水  
伊川聯名懼其久而磨滅取搨本重刻于石今

世所傳碑皆沈氏刻子孫有餘榮矣

元程二守

元絳程師孟宋熙寧中先後守福州山刻石刻  
多二公筆至今傳為佳事佳話興除舉廢皆稱  
二公二公俱吳郡人生平稱臭味交故出守行  
事亦大相類

丁刻字

趙美昔時鄱陽丁信可者善刻字凡美昔書極  
喜信可鐫刻打搨他手不如也番君廟乾元寺

二碑美昔所書皆信可刻今信可子孫猶日搨  
賣丁氏食此碑已十餘世矣他人不得搨也余  
至鄱陽目擊之

袖皮打碑

桂海虞衡志云打碑用袖子皮蘸墨以代墮宜  
墨而不損紙試之良然

長慶石

萬曆甲申吳興張樵通卜築玲瓏山得一石乃  
唐長慶尚陵羽故物可尺許有孟郊題曰長高



慶甲辰餘英孟邳來訪竟陵陸青翁字法道古  
尚未剝蝕揮通造軒貯之名友石軒好事者皆  
為題詠後贈謝在杭為王百谷索去今為王氏  
家物

文人二十四則

游夏文學

聖門列四科惟以文學許游夏子夏於易則有  
傳於詩則有序於禮則有儀禮喪服篇於春秋  
則授之公羊高穀梁赤於論語則鄭康成以為

子夏與仲弓所撰定者許以文學夫何忝哉不  
知子游當時有何文學而魯論稱之也當是世  
遠而撰述不傳耳若非魯論并稱之後世孰知  
子游亦文學也哉

徐氏文人

古今文人之盛惟徐氏歷代不之建安七子則  
有徐幹一代文宗則有徐陵河東三絕則有徐  
彥伯江南文士則有徐鉉徐鉉詩派法嗣則有  
徐俯晚宋四靈則有徐道暉徐致中國初四家

則有徐貴盛明四家則有徐禎鄉中系七子則  
有徐中行此皆丁極盛之時而文士輩出名震  
霄壤者至于單詞片語流傳文苑不可勝紀矣

祖孫

王羲之七世孫曰僧智永謝靈運十世孫曰僧  
皎然書法詩學皆不愧祖凡後世侈譚之不因  
沙門而薄其祖先也韓侂胄為韓魏公之裔時  
論為之嘆息豈紫衣宰相反不如緇衣髡徒乎  
信所重在彼而不在此也

江淹夢

史補江淹夢張景陽寄錦取還文章日蹙又謂  
夢郭景純索舊筆還為詩才盡何二夢相似之  
甚然則淹之詩賦皆少作邪

沈約

獨異志云沈約家藏書十二萬卷然心僻惡聞  
人一善如萬箭攢心噫此誇語也劉勰著雕龍  
既成未為時流所稱取定於沈約投之車中約  
取讀大重之嘗陳諸几案倘萬箭攢心定不爾

爾

嚴武不殺杜甫

新唐書嚴武傳云武最厚杜甫然欲殺甫數矣甫本傳云武欲殺甫集吏于門武將出冠鉤于簾者三左右白其毋奔救得免而舊史甫本傳云甫登武床瞪目視曰嚴挺之乃有此兒武雖急暴不以為忤然則武未嘗欲殺甫也武平甫賦八哀詩云空餘老賓客身上愧簪纓甫之感武者至矣豈人有欲殺我者而反哀之耶必不

然矣

李杜子孫

盛唐詩人莫過李杜其子時早夫至孫曾則泯然矣晚唐詩人莫過元白又皆無嗣惟韓退之子晁孫緝袞俱登進士蟬聯金紫天之報施誠不可知

李益

柳子厚為其父作神道表碑陰載其先友六十七人凡天下善士舉集焉知名者僅二十人其

中能詩者李益一人而已。唐以詩程士為官者未必人人知詩也。六十七人，芳得一李益，不亦難乎。

賈島馬端臨嚴羽羅願

賈島詩歌清淡奇峭，可與孟郊張籍以肩。舊史不為立傳，新史附名韓愈之後，數言而已。馬貴與博洽卓絕古今嚴儀卿論詩理入三昧，羅端良翼推富如武庫，宋史俱不為立傳，并附名亦無之。史臣之不公如此，蓋冠蓋之華易登史冊。

布衣之傑，難上石渠。賈島官不過主簿，貴與儀卿終身草茅，端良位不甚顯，故史臣特畧之。然公之名自有不朽信，夫文士不因位顯，亦不藉史傳也。

文士好奇

唐劉蛻取生平所為文千一百八十紙，起塚以封之，自作銘曰：文半文半，其鬼神乎。風水惟貞，將利其子孫乎。白居易寫生平所為詩四部，置諸四大藏經中，與寺僧約曰：不出院門，不借官。

客有好事者任就觀之。唐求詩成置之木瓢。任  
流江中。識者得之曰。此唐山人詩瓢也。陸龜蒙  
以平日詩文稿藏之像設腹中。至宋咸淳中。里  
人醉仆其像。腹稿始傳。南齊褚澄著遺書十卷。  
刻石納之墓中。後郡盜發墓。得甫廣父子釋義。  
以傳。古人藏文各別。獨見不相師。龔元魯脩翻  
陽人有詩朋十人。皆工詩賦。恐罹兵燹。失傳。延  
埴為甕。刻瘞山中。名曰詩塚。宋濂為之銘。蓋倣  
劉琨也。劉琨文塚在今蜀梓州南二里。兜率寺。

庭前古栢數百株。皆虬枝龍幹。至今尚存。

香山飲酒

白香山喜酒。每飲必賦。集中飲酒詩九百首。  
今人無香山之詩。沉冥麴蘖。只可目為酒囊。非  
真能飲酒者也。

樂天詩友

白香山詩與元微之倡和。什有六七。元白齊名。  
微之為樂天作詩序。手自排綴。成五十卷。不可  
謂不密矣。乃樂天作醉吟先生傳云。與嵩山僧

如滿為空門友。平泉客章楚為山水友。彭城劉  
夢得為詩友。安定皇甫朗之為酒友。歎不及微  
之誠不可解。

元微之

元白雖齊名而微之品格不逮樂天遠甚。微之  
少通崔鶯鶯。作會真記。暴其事。既通籍。又宣緣  
宦官。得知制誥。為武儒。衡鄙厭恬。不知恠。文人  
血行殆斯人與。

温李

北夢瑣言云。温廷筠舊名岐。一名廷雲。與李商  
隱齊名。時號温李。今皆以李賀為温李。非也。

誌銘兩手

明道間洛陽張堯夫卒。尹洙作墓誌。歐陽脩為  
之銘。志銘出兩手。亦古今希覲也。

憐才

王荆公見劉季孫杖藜携酒看芝山詩。即判監  
酒稅。見盧秉但得有錢留客醉之句。立薦于朝。  
因登鄉貳。秦檜聞陸士規黃陵廟一絕。傾倒如

平生若宰執不憐才。反荆公秦檜之不若矣。

進稽古錄表

司馬溫公撰稽古錄成。黃魯直為作進表。今黃集刻之。司馬集刪之。可見古人文。字無所假借。亦不掩為已有也。

祭文 黃魯

宋張子韶祭洪忠宣曰。維某年月日。某官謹以清酌之奠。致祭于某官之靈。嗚呼哀哉。尚享其子洪邁深感其情。今世祭文。濫觴可厭。使人：

如子韶不知省許多紙筆。黃云。文以足言。以足志。如子韶云々。不幾于沒字碑乎。豈可為訓。惟武廟祭新文。禧云。朕在東宮。先生為傳。朕卽帝位。先生為輔。朕今渡江。聞先生訃。嗚呼哀哉。則言簡意盡者也。

彭乘鄭景望張世南

宋彭乘著墨客揮犀。鄭景望著蒙齋筆談。張世南著游宦紀聞。三公言函事甚詳。蓋曾宦于函者。郡志俱逸其名。尚俟攷其人而增之。

黃華澹游

金王庭筠字子端河東人。大定間舉進士。官不  
達。寓彰德黃華山寺。自號黃華老人。善草書。有  
文集四十卷。子曼慶亦能詩。自號澹游。善畫竹。  
仕至行省郎中。

句曲外史

元茅山道士張天雨。自號句曲外史。工書善詩。  
宋張九成之裔孫也。

耽梨生

洪武初長樂鄭琳。自號耽梨生。讀書播耨。不求  
南達。同時與鄭定助教友善。練子寧有耽梨生  
賦。張顯宗為之跋。又有建安蘇伯厚張智等詩。  
文子萬奎為廣州教授。郡志所不載。

文人慳一第

國朝科目。限人長才者。或慳一第。始文徵明。王  
寵文。彭文嘉。何良俊。田藝畝。大任。文章俱足。衛  
名世。獨靳一舉。竟以歲貢起家。豈非命耶。

郎田二先生



枕別近代博雅君子仁和郎瑛錢唐田藝蘅瑛  
字仁寶號草橋少孤長為諸生尋謝去家故饒  
一以購書所藏載籍古圖畫金石刻甚富而貧  
日貧瑛無所顧歎故大屋樹高度列置數几危  
坐諷誦辨異同所著有訂正孝經大學格物通  
各一卷華忠錄一卷青史哀鉞六十卷後昆軒  
然俱軼弗傳者七條彙稿耳藝蘅字子藝號傳  
香字性放曠不羈善酒任俠喜著書生平所著  
文集前後數十卷老子指玄一卷煮泉小品一

卷梅花新譜一卷詩女史二十卷留青月札四  
十卷晚歲以貢為新安博士歸常衣絳衣挾二  
小鬟遊湖上或逢友人則令小鬟進酒促坐談  
謔時挾內人遍遊諸山日暮無驢覓得其一  
乃與內人共跨一驢入城藝蘅詩文在六朝初  
唐間駁入作者之室瑛辨証攷核不減藝蘅  
至于談詩猶說夢也然瑛事母孝兩刲股皆愈  
內行尤可述耳

人物攷

女二十七則

男十九則

杜宇警龜靈

戰國時杜宇君于蜀舉荆人警龜治水。既平禪之位死皆葬于郫。今郫南一里二塚對峙。警靈一云警龜令。

入公名

蘇飛李尚左吳田申雷被毛被伍被習昌

兩京房

漢有兩京房一為楊何弟子官齊郡太守宣帝時人一為焦延壽弟子東郡頓丘人其說長于

災變今漢書京房傳及世所傳京氏易傳皆延壽弟子也

林闔

林闔氏楊雄之師也見路史七卷第十三之註

白帝非叛

王莽篡漢凡世之豪傑有志天下者皆得起而誅之公孫述欲誅莽非一日也方豪傑群起之時孰不欲頓八紘擲萬乘述不得罪于漢而盡有益列之地子養一方者十有三年大有功德

于蜀臨陣殞命與國存亡一念不降可謂賢矣  
史書述叛豈可與叛漢者同科按更始二年述  
自立為蜀王明年夏四月改元龍興是歲漢世  
祖以蕭王即位鄒南改元建武是為光武皇帝  
當是時雌雄未定成敗未分萬一使述功成則  
光武亦為僭亂耳然光武漢裔漢德亦興蜀僻  
一隅成功匪易述與光武猶項羽之高祖也書  
之為叛不亦過乎

寶志公楊大年

寶誌公宋元嘉中現于東陽郡古木鷹巢中手  
類鳥爪朱氏婦聞巢中兒啼遂收育之因以朱  
為姓楊大年始生則一雀雛家人驚駭貯而棄  
之江其叔父異之追至江濱開視則雀雛嬰兒  
具焉体猶有紫毛毳尺餘既月乃落世間恠事往  
往有之不但后稷之生為異矣

白馬三郎

常山有白馬三郎廟宋季禱早有應紹興中龍  
圖梁默奏于朝曰白馬三郎王審知號也生前

已享王爵不宜猶用軍中之號改額昭應帝山  
與閩接壤至今祠祀

### 陳冕

陳子昂字伯玉見盧藏用敘并唐書獨雲溪友  
議載陳拾遺名冕字子昂雲溪唐范攄也當必  
有據

### 雲峯檀越

雲峰祖師初至福州求一菴基弗得候官人藍  
文錦指門首池畔大枯樹下草菴與師居之唐

咸通十一年見四方雲衲奔湊難安廣衆將所  
居屋宇三百餘間米倉十二間庄田二十所水  
牛三百六十頭諸庄田各立契書分明歲收  
米一萬一百石淨盡捨入常住建大梵刹即今  
之雲峰寺也乾符二年閩忠懿王具奏僖宗勅  
號禪師真覺大師封檀越蓋文鄉明護侯王男  
藍應潮通祐神君今護法伽藍寔文鄉父子也  
歷數百年香火不絕使當時不發心捨此誰其  
逼之文鄉不難一決不惟獲福田利益而寺存

則香火永以不墜。今之擅文卿之富者，不之其  
家產留以遺所不知何人。至於布施，錙銖慳惜。  
悲夫悲夫。

鐵冠道人

蘇子瞻在海外，自號鍊冠道人。詹仲和亦號鍊  
冠道人。楊康夫亦號鍊冠道人。洪武初，有鐵冠  
道人張景華，常與

太祖言休咎未來事。

龜字諱

唐宋人，不甚諱龜字。張志和始名龜齡，開元歌

者名李龜年，陸魯望名龜蒙，白樂天幼子名龜  
郎，咸通中會稽太守王龜殷，踐猷號五總龜，皇  
祐殿中丞李龜齡，宣和進士戴龜朋，彭千壽名  
龜年，善畫者劉崇龜，陳朝瑞名總龜，王十朋字  
龜齡，楊時號龜山，崇寧中黃德邵名龜年，淳佑  
中枯蒼教授潘元龜，洪駒父兄字龜父，咸以龜  
為美稱也。然蘇子瞻嘲呂微仲畫睡，有六眼龜  
口號，則宋時亦以龜為戲謔耳。予謂十朋千壽  
中立德邵皆在子瞻後，豈子瞻時有此謔而後

人徑取以為號耶。大抵子瞻謔事多出宋元小說。假托為多。未必有是事耳。但不知龜字諱于何代。近世以龜命名者絕少。獨鉛山費同鄉弟名龜年。官廣西灌陽知縣。惠安亦有楊龜年。官教諭。

潘陳同母辨

齊東野語云。陳了翁之父尚書與潘良貴之父義榮情好甚密。潘一日謂陳曰。吾二人官職年齒種之相似。獸有一事不如公。甚以為恨。陳同

之。潘曰。公有三子。我乃無之。陳曰。我有一婢已生子矣。當以奉借。他日生子。即見還。既而遣至。即了翁之母也。未幾生良貴。後其母遂來往兩家焉。一母生二名儒。亦前所未有。事噫。此說荒謬。不根之甚也。按了翁年譜。父陳偁。仁宗朝為吏部尚書。以嘉祐二年生。了翁年二十三登進士。至宣和六年卒。享年六十八。又按朱子文集。良貴父名祖仁。贈中奉大夫。受宋官所云。其官職相似。一謬也。了翁宣和六年卒。良貴宣和

初始為博士。歲月相遠。二謬也。朱子為潘時作墓志銘云。良貴有兄良佐。以儒學教授諸弟。良貴從授學。是祖仁已有長子。安得言無子。三謬也。了翁。閩沙縣人。良貴浙金華人。其母安能來往兩家。四謬也。欲誣名賢。初為不根之說。名曰齊東野語。豈虛也哉。

菊坡

宋李崔丞相與之號菊坡。至八世。其家有菊數本。皆一帶兩莖。人咸異之。

以字行

國初名臣。多以字行。楊士奇名遇。練子寧名安。黃子澄名湜。李時勉名懋。李至剛名銅。唐之淳名愚。士吳伯宗名祐。張孟兼名丁。劉伯序名秩。董良史名紀。鄭居貞名恒。許廷慎名伯旅。胡虛白名奎。李昌祺名禎。王汝玉名璫。劉三吾名昆。孫桂彥良名德。稱全幼孜名善。劉子欽名敬。錢習禮名幹。周是脩名德。劉李麓名韶。至于塞義。舊名瑤。楊榮舊名子榮。胡靖舊名廣。李騏舊名

馬皆出 上賜也。

葉給事

秀水屠侍御撰建文朝野類編會輯諸書詳備周恚有葉福字叔疇閩縣人建文庚辰進士授給事中極言宗室之非宜建文君怒杖幾死亟遣人歸養其母靖難兵攻金川門首犯其鋒死衣冠歸葬久諱其事楊文敏公入省求其從孫為文碣其墓萬曆初奉恩詔祀于鄉賢祠林文恪公脩郡志始為立傳人鮮知之故屠侍御未

之列也當時吾郡死建文之難者止福一人而古田林英字章叔為御史自經死妻宋氏亦自經皆彙編所不載按朝野彙編乃陳眉公所纂名史待屠侍御備為已書更名彙編志吾國死事者止陳彥回陳繼之而不及福與英今史相國世程官南少宰日率同鄉建三忠祠清涼山祀二陳與福英猶缺焉蓋當時無有知其事者志之以俟後人補此佚典也

孫太初攷



太白山人孫一元同時諸公與之倡和寔不知  
其何許人鄭善夫序其詩曰關西豪傑也李夢  
陽殷雲霄劉麟皆云關中人惟王世貞云太初  
裔本王家託跡方外馮夢禎云關西王孫易名  
為孫一元燦近聞徐渭逸稿孫山人考云孫一  
元父早亡而貧以抄書役某府中府公嘉之為  
出貲特補吏密事多任之會覲索白金四百兩  
使山人致布政使途被盜無以報命遂止抵浙  
寓西湖休寧有范燦者其祖與山人交厚燦告

渭曰嘉靖某年諸暨縣丞孫鏞罷官歸寓江都  
燦大父世高於鹽遇鏞頗頌蓋一日偶及山人  
事鏞大駭一一道山人出亡事便取所隨譜合  
之鏞即携其子來子貌亦似山人鏞遂向吾叔  
今何在燦大父云云鏞強大父偕至湖州拜其  
世母施氏并其已嫁妹三人相對而哭渭攷諸  
暨官師表嘉靖十二年縣丞果孫鏞也乃曰蜀  
人山人舊自稱秦人非志者悞乃山人謬託為  
秦人也觀渭斯攷則太初非宗室亦非也南中人  
也明矣

嶽禱

太宰倪公岳父尚書文僖公嘗代祀北嶽以禱  
祀而生公故名豈維嶽降神耶

滇二孝子

滇南范寅為諸生屢試不第遂成心疾出游不  
知所之嘗語其子師顏云吾葫蘆山人也爾他  
日於此訪我師顏尚幼既長補諸生以嘉靖壬  
子舉於鄉鹿鳴次日即裹糧之四方尋父凡山  
岩市鎮僻壤遐陬無弗到行三年至蜀有葫蘆

寺扣主僧三年前有稱葫蘆山人者寓此今謂  
化而瘞之近因且出其手札真寅筆也師顏慟  
絕芟葦得穴刺血入骸斂而返墓焉御史黃中  
疏而旌之又有趙重華大理太和縣人父廷瑞  
示諸生亦以不第遠遊莫知所往華甫七歲至  
年二十一母沒乃出尋父榜其背曰萬里尋親  
至武當山有字之嘉靖四十四年十二月二十  
二日大理趙廷瑞至此華至日乃萬曆六年十  
二月二十二日也又向南至建康祈于三茅君

夢玄帝謂之曰。爾父故在如是者三。覺而由丹陽至毘陵。遇老僧示。往無錫南禪寺。語訖不見。明日至南禪。見皤髮老叟。曝背廊下。華心疑之。伏地曰。我雲南人。叟曰。我亦滇人。出遊時一子七歲。亦潛然淚下。各道姓名。相持而哭。遂歸故鄉。茅坤為文以紀之。

### 長人

苻堅時有夏默。獲磨那申香三人。身長一丈八尺。並多力。善射。三人每食飯一石。肉三十斤。

### 翟母漂母

以下女人

漢高帝厄於楚。餒甚。翟母常饋食。及帝業成。母已死矣。高帝封其墓。至今名封丘縣。漂母哀韓信而進食。後報以千金。至今廟祀。所謂一飯之德不忘也。今人報德如漢君臣者鮮矣。

### 美人名風

晉世美人。以風名者。惠帝皇后諱南風。洛中謠曰。南風烈。吹黃沙。石崇婢名翔風。

### 翔風

石室毒名翔風諸書互見不同有曰翔風有曰  
翔風翔翔翔三字相類必有一定者

衛夫人

衛夫人名鑠字茂漪晉汝隄太守李鉅妻王逸  
母之師也

崔鶯墓志

志稱崔鶯嫁太常寺協律郎鄭恒字行甫  
文業著于當時享年六十夫人崔氏享年七十  
有六子六人奉貫墓為銘其墓誌銘久瘞土中

明成化間黎人得諸廢塚居邑之西北五十  
里曰舊魏縣蓋古之淇澳也乃甯之崔氏為中

亭香案石又若干年而莫之知尋得其家有昏  
吏名吉者識之遂白于邑長吏邢公邢置之邑  
治而其迹始著陳眉公收其文于古文品外錄  
欲一洗崔氏冰玉之耻予謂會真之記出諸微  
之鶯之名因以大著若讀秦之墓誌不過尋  
常一貴人妻耳何足奇

李易安

李易安格非之女也。格非字文叔，濟南人。見張  
文潛集。

易安更嫁

李易安，趙明誠之妻也。漁隱叢話云：趙無嗣，李  
又更嫁，非類。且云：其啓曰：猥以柔榆之晚景，配  
茲駟駟之下才，殊謬。安不足信。蓋易安自撰金  
石錄後序言：明誠兩為郡守，建炎己酉八月十  
八月疾卒。且云：余自少陸機作賦之二年，至置  
蓬瑗，知非之兩歲，三十四年之間，憂患得失，何

其多也。作序在紹興二年，李五十有二老矣。清  
獻公之婦，郡守之妻，必無更嫁之理。今各書所  
載金石錄序，皆非全文。惟余家所藏舊本序語  
全載，更嫁之說不知起于何人。太誣賢媛也。容  
齋隨筆及筆叢古文品外錄，俱非全文。

眇倡啞倡

秦少游傳眇倡云：倡負不能自贍，與母西遊京  
師。京師，邑府也。美盼巧笑，以千萬計。若具兩目，  
猶恐不售。况眇一焉，其瘠于溝中必矣。行抵梁

舍於濱河。逆旅有少年見而悅之。為留飲。終日。因大嬖娶。置別第。謝絕姻黨。身執爨以奉之。倡飯少年亦飯。倡疾。少年不食。或有嘲之。少年忿。曰。自予得若人。視世之女子。無不餘一目者。夫佳目得一足矣。奚以多為。楊康夫傳。啞娼云。倡錢唐人也。生無啼聲。父母欲棄之。年及笄。天質秀利。中益警穎。京師有大木賈。過錢唐。聞啞娼名。求見大喜。倍價聘之。左右曰。娼以聲取悅。啞而倍價以聘。何愚也。賈曰。婦以長舌敗人之家。

予聘無長舌。不聘工歌。且笑。遂挾之歸。賈侍姬百十人。啞娼寵專房。一飲食非啞娼不甘。賈婦死。推啞娼為繼。生三子。焉夫倡。至于財。啞宜乎無顧盼者。乃少年大賈娶之。少游廉夫傳之。信乎物無定價。隨所遇也。

名人生平墓地

十四則

名姬附

許由塚

箕山有許由塚。乃石槲。歲飢。有惡少發之。輒合。至今猶存。

扁鵲墓

湯陰有扁鵲墓墓前有土可以療飢鄉人試之輒驗亦理之渺茫者

徐君墓

黃參

一統志河南襄城縣城北二十里有徐君墓墓前有樹相傳為李札掛劍處名曰靈樹按史李札使魯過徐其地今在泗州襄城非徐地安得有墓奚從而掛劍哉史稱札還至徐徐君已死則其死在徐明矣其曰解劍繫其塚樹則其塚

在徐亦明矣襄城靈樹之說何據徐君墓在張  
舟過其地展墓而酌以詩  
墓上草名劍草可除眼疾

郭璞墓

楊子江金山雪根島在水中特起志以為郭璞墓在焉六朝事迹謂璞墓在真武湖中大墩上璞為王敦所害當時必有收其骨者後世皆指水中之山為璞墓者以璞精於理必擇其奇處而名之金山真武湖之說謬也

李由生卒墓

李白舊史稱山東人父為任城尉因家焉流夜  
郎赦還醉死于宣城新史稱白生于巴西卒葬  
姑孰東麓元和末觀察范傳正祭其塚訪後裔  
惟二孫女嫁為民妻後改葬青山立二碑要燭  
按全蜀執文志載唐劉全白作白墓碣記云白  
屬漢人玄宗辟翰林待詔因和番書并上宣唐  
鴻猷一篇上重之欲以編語之任委之為同列  
所誦詔命歸山遂放浪天下以詩酒自適代宗  
登極拜拾遺聞命之後逝矣有子名伯禽全白

幼以詩為君所知邑有賢宰顧公遊秦遂表白  
墳而題其石翼傳于將來也貞元六年四月七  
日記以此攷之白非生于山東巴西非死于姑  
孰宣城非葬于東麓青山而生當在屬漢墓當  
在秦如有子伯禽非斬然後昆也全白與青蓮  
同時墓碣當為實錄二史恐非傳信耳項斯經  
李白墓云夜郎歸未老醉死此江邊墓缺官家  
禮詩殘樂府篇歸魂應到蜀小碣豈旌賢身沒  
猶何罪遺墳野火然



李白生卒二史既自矛盾後人又有采石捉月之說愈不足信按李陽水序謂白疾亟枕上授水俾為集序是白死于牖下非江中明矣梅聖俞詩有云便當騎鯨上青天青山有冢人漫傳又信捉月之事矣陳眉公謂李白生于彰明縣青蓮鄉故號青蓮想別有據

杜甫卒年

杜甫生于先天元年壬子卒于大曆五年庚戌

享年五十有九舊唐書云甫以永泰二年啗牛肉白酒一夕卒當是庚午歲尚早四年誤也新史正之云大曆中卒

杜甫卒葬

唐書云杜甫客耒陽嘗遊嶽廟為暴雨所阻旬日不得食耒陽縣令棹舟迎之乃得還啗牛肉白酒一夕卒王洙序杜詩亦沿史氏言醉飽卒元稹墓志言甫扁舟下荆楚間竟以寓卒旅殯岳陽歿後四十餘年始克葬然則甫之埋骨于

偃師也明矣。又按劇談云：甫客耒陽，一日舟中飲醉，江水暴漲，甫為驚濤漂汎，其尸不知落何處。玄宗思甫，詔求之，是令積空土于江上，曰：甫為白酒牛炙，脹而死。按玄宗自蜀歸，公方為諫官，帝晏駕，甫在蜀，代宗登極八年，甫始卒。年月失實，不足信也。然宋人有題子美墓云：一堆空土，烟蓋裏空。使詩人悲歎起，捉月走入千尺波。忠諫便沉汨羅底，固知天意有所存。三賢亦同歸一水，則又言甫死于水矣。

李賀生平

宋初唐書李賀傳：卒年二十七。李商隱作賀小傳：年二十四。王元美危言賀年二十六。所載不一。商隱與賀同時，當為實錄。

元微之卒葬

南部新書云：元稹之薨也，卜葬之夕，為火所焚，以煨燼之餘，瘞之。予按白居易為元稹作墓志，以太和五年暴疾薨于位，六年七月十二日，祔葬于咸陽縣奉賢鄉洪瀆原，未嘗言及火焚。足

徵南郭之墓

白傳墓地

賈氏談錄云白居易墓龍門山河南尹盧貞刻  
醉吟先生傳於石之墓側洛陽士人過者奠以  
卮酒塚前方丈之石常成泥潭煠按居易志銘  
墓在華州下邽縣臨津里北原祔侍郎僕射二  
先塋戒沒後勿建神道碑但於墓前立一石刻  
吾醉吟先生傳一本可矣龍門山在今西安府  
韓城縣東北八十里下邽縣即古渭南縣在華

州城西五十里相去遠甚賈氏之言似為無據

梅花道人墓

元梅花道人吳仲珪墓在蘇州武塘題曰梅花  
和尚之塔今有橡樹猶存

李罕同墓

李夢陽北地人墓在河南府鈞州大陽山侍郎  
崔銑作墓志

朝雲琴操墓

朝雲墓在惠州西湖有司為治墓隧琴操墓在

天目山石佛殿角後人為之立碑至是山者亦  
多題咏甚矣人之貴附青雲以不朽也

人倫盛事十二則

### 兩世史官

古有兩世為史官者司馬談子遷劉向子歆班  
彪子固王銓子隱姚察子簡李太師孺廷封劉  
知幾子餗若吾閩林文安三世史官古所希觀

八龍五馬黃參

南齊柳元伯子五人皆領別五馬參差于亭唐

殷文圭云荀家門內羅列八龍柳氏亭邊參差  
五馬黃云若吾家璞公瞻公兩校書璞公子仁  
灑三史仁渥太子正字仁滔御史仁藻著作郎  
仁渭秘書監庶子仁澤武狀元世稱一門五學  
士家亦何減八龍五馬

### 文惠文安

宋陳文惠堯佐以太子太師致仕卒年八十二  
子十人長尚書主客郎中述古次比部員外郎  
來古次主客員外郎學古次虞部員外郎道古

次大理寺評事博古。次殿中丞修古。次秘書省  
正字履古。次光祿丞游古。次大理丞襲古。次太  
常丞太祝象古。我朝林文安翰以太子太保致  
仕。卒年八十六。子男九人。長鄉進士庭桂。次太  
子太保工部尚書庭楫。次指揮僉事庭楷。次慶  
遠知府庭杓。次廣東都司經歷庭樟。次潮州推  
官庭榆。次上虞縣丞庭枌。次鄉進士庭枝。次太  
子少保禮部尚書庭機。古今多福多壽多男子。  
兩公而外不多見也。二公俱史館知制誥。俱謚

文。而子皆列宦籍。尤相等也。

狀元宰相

宋狀元為宰相者六人。呂蒙正。王魯。李迪。宋祁。  
留夢炎。文天祥。國朝狀元為相者十四人。吳伯  
宗。胡廣。馬愉。曹爾陳。循。彭時。謝遷。費宏。顧鼎臣。  
李春芳。申時行。朱國祚。周延儒。商輅。

浙江文場

弘治壬子。浙江文場中。夜半。場中人見東西立  
二巨人。一衣緋。一衣綠。合言曰。三人好做事。遂

隱不見。是年胡公世寧、王公守仁、孫公燧同舉于鄉。卒之宸濠之變，胡公發其奸，孫公折其氣，王公平其難。三人相次成功，云見王允寧、孫忠烈傳。

第十九名

建陽李有年，舉嘉靖庚子鄉試第十九名。其弟有則，舉己酉，亦第十九名。有年子聞韶，舉萬曆甲午，亦第十九名。父子兄弟榜次相同，亦一奇也。又建寧貳守吳興施可大，二子壽明、浚明，先

後中萬曆壬辰乙未會試，俱第十九名，尤奇矣。

掾曹

國初進取不拘資格，有掾史而置身青雲者，自况鍾外不可悉數。如函縣吳復，任工部侍郎；陳永祥，任惠州知府；南平楊文達，惠安洪炬，俱任太僕寺丞；連江孫瑛，任吏部郎中；建安盧大政，任吏部主事；候官胡鼎，任戶部郎中；福清游元欽，任濟南通判；高世岳，任承天通判；孫瑛、洪武中陳永祥、宣德中吳復、胡鼎、天順中楊文達、洪

炬正德中盧大政游元欽高世岳嘉靖中

父子百歲

義烏人陳世恭至萬曆戊寅年一百六歲子陳迪亦壽九十八歲

福清三老

宋季福清有三老政和間林雄年百七歲紹興中林洞年百十七歲並恩授迪功郎張魏公後名其堂曰眉壽二子年俱九十餘同時有吳齊年九十三亦恩授迪功郎又蔡伯佈三歲舉神

童年八十七平林瓌年九十平

烏青九老姓氏

宣德間湖洲烏青鎮有九老趙巖官序班年九十一吳煥年九十趙岐年八十九孫孟吉建文中太常博士年八十五水宗達運司年八十二漏瑜建文中御史唐其諒建文中縣丞胡敏錢郁年皆八十漏瑜會稽人唐其諒鳳陽人革除後流寓烏鎮俱能詩結社倡和亦一時之盛

莆田九老八老

嘉靖初莆田有逸老會皆鄉邦之望都憲林茂  
達年七十五憲副吳希由逸士林嘉績俱年六  
十七御史林李瓊知縣宋元翰俱年六十五憲  
副林有年六十四侍郎鄭岳年六十三侍郎年  
林富寺丞李廷梧亦幾六十有逸老詩集行于  
世隆慶己巳有耆老會太守鄭弼年七十八少  
參雍瀾年七十七太守陳敘年七十六運使林  
汝永年七十五主事柯維騏年七十四太守林  
允宗年七十二尚書康大和年七十一大和賦

詩云故里重南耆老會七人五百二十三後尚  
書林雲同年六十九亦與斯會真太平盛事也

同居

世傳同居皆曰張公藝九世難矣熙寧中上虞  
劉義詔家同居十世四百餘人趙清獻為越州  
具奏上聞旌表其門人鮮知者田子執留青日  
札序至十八世義詔不與



Faint bleed-through text from the reverse side of the page, including the characters "徐氏筆精卷之八".

徐氏筆精卷之八

人事 二十五則

積善之家

人行一善可謂之善矣。行數善可謂之積善之家。如范希文父子捐麥舟事可謂之積善之家矣。易曰積善之家必有余慶。非指一人一事言。

晉安徐 煥興公 謨輯

同里邵捷春 肇復 訂定

溫陵黃居 中明 立編次

也。

智岩警語

世有怨府畏途禍胎鬼趣積習晏安於其中未  
曾一念覺悟今人於四者無不蹈之後患其能  
免乎。

罷官蓋棺

見一人罷官功名富貴之念當添一分淡送一  
人蓋棺妻妾兒女之情當減一分輕  
殺人欠債

誘云殺人償命欠債還錢今之豪家以威勢殺  
人貨賄官府邸脫巨室以厚息逼人致死官府  
亦不之究是殺人還錢欠債償命也。

裸葬

楊王孫家業千金厚自奉養及病乃囑其子裸  
葬今人家累千金生前墓鹽布素死而求美木  
紵絲祭而烹豕刲羊葬而伐石起塚視王孫孰  
痴孰達哉。

好給汝門

何次道好佛供給沙門而不施貧乞殷仲堪好  
道不恡財賄而嗇于周急今有佞佛求福者廣  
施貨財不吝千金而貧交勘一錢之贈與其結  
納髡徒不如周賑困乏

郡吏碎玉

郡伯喻公政偶裁答遠書呼役取玉印色匣役  
失手墜地郡伯不問也役請罪反慰諭之次日  
役重價購匣償公公喜而還其價其雅量與裴  
行儉吏碎瑪瑙盤談笑自若韓琦吏碎玉杯神

色不異何多讓哉

鬱林石

唐末陸龜蒙績裔孫也其門有巨石是績鬱林  
携歸者至龜蒙時猶世保其居李德裕殷勤戒  
子孫不削子孫保守信夫子孫賢不肯非祖父  
文字可訓戒也今鬱林石移置察院前巍然數  
尺號廉石吳文定作廉石記

避嫌

宋宰相韓億謚忠憲四子綜絳維縝同奏名禮

部忠憲上疏曰臣子叨陛下科第雖非有司觀  
望然臣既備位政府天下將謂由臣致此臣教  
子既已有成又何必昭示四方以為榮觀哉乞  
盡免殿試唱第誠懇再三仁宗嘉歎遂俞所請  
我朝陳循王文之子不第因而彈劾試官萬曆  
初江陵柄國二子皆及第一子進士未幾削奪  
流貶方之忠憲能無媿乎

姑婦

南唐樞密杜業妻張氏甚妬烈祖命元后召誠

之張雪涕曰業事陛下所藉者駑馬之力未竭  
耳若縱之反貽其禍將悞於任使矣烈祖獎嘆  
以銀盤絲段賞之夫姑婦既不利其夫而又甘  
言以誑人主反獲厚賞可畏哉

惡婦

婦人之惡過於男子生前無論即死後猶能為  
祟如妬婦津是已温韜發掘唐帝諸陵剔取金  
室惟乾陵以凡雨屢作不能發土人云或有游  
戲侮慢及取其瓦石皆有靈響音

延師舫

陳履吉林熙工皆余友也熙工修淨業足跡  
入城市履吉雅重之一日具贄幣拜熙工為師  
執弟子禮特造一船扁曰延師舫履吉長熙工  
一歲鬚髭盡白同輩無不笑之目為病狂履吉  
曰今之司理縣令皆少年科第無道德學問足  
以教人而人望風投拜惟恐其不我納也一與  
晉接人以為榮吾之求師非求少年權貴世自  
病狂吾何病之有然熙工儼然受其隅坐兩見

其高也

交友

利瑪竇歐羅巴人也著天主實義人傳誦之而  
交友論尤切中人情有云古有二人同行一極  
富一極貧或曰二人為友至密矣竇法德古之賢  
曰既然何一為富者一為貧者哉言友之物皆  
與共也又云視其人之友如林則知其德之盛  
視其人之友落葉則知其德之薄

死友

張幼于有友姚文學懋言借齋中養疾、篤其伯氏懋樂欲舁之歸幼于艱然曰生為吾友死即非吾友耶竟卒于館舍幼于服總送之嘗聞陳沂蓄德錄載吳文定寬為脩撰時有同年賀恩寢疾將易箦託于公之有廬公即掃室請遷及卒舉殮于中堂使其子服喪以答弔者幼于此舉可謂不愧文定矣

通財

余嘗慨朋友無通財之誼聖門諸賢推顏子原

憲為最顏則簞食瓢飲所居陋巷原則三旬九食捉衿見肘甕牖繩樞貧亦極矣乃同時有子貢廢箸鬻財于曹魯之間最為饒益且結駟連騎以訪原憲又有公西華乘肥衣輕當時亦不能分給二子稍、不至之絕可見通財之義賢者猶難之况末世乎善夫利西秦交友論曰一貧一富號曰相知某人曰既云相知胡為一貧一富哉

溫公僕

司馬溫公家一僕三十年止稱君實許魯齋在  
中書欲買一僕牙僧以能應對閒禮節者進輒  
謝去後得蓬首垢面愚騃者用之或詰其故曰  
聰明過我反為其所使矣噫此腐儒之見也  
蘧伯玉使人於孔子孔子曰使乎使乎未嘗愛  
愚騃之人也至司馬公為其僕呼君實乃公之  
盛德若人家畜此奴不大悞事耶後世腐儒遵  
此為訓是主僕皆憤者耳閩中福興漳泉人  
家僕輩頗跳梁然皆識體至延建邵汀主人肅

客而捧茶僮奴隅坐主人不以為恠僕愚騃垢  
面終身不知着衣戴帽魯齋之言悞之也

狐鼠盜

晝伏夜動者狐也鼠也蚊盜也四者乘陰氣人  
之所惡也士君子昏夜乞哀其狐鼠蚊賊之類  
與

壽夭

戶樞不蠹流水不腐是以安逸者常多疾病勞  
碌者恒鮮損傷好花易謝不材天年是以智巧

者恒致夭折魯鈍者多享遐齡

同干支

先府君與同邑宋某同生正德癸酉年月日時俱同。補諸生同食餼同月生女又同。遲嗣續至丁內外艱偶值疾病無弗同者。嘉靖戊午宋以病卒無嗣。辛酉府君生余伯兄及為邑宰并生余及弟較宋某多三十四年前半世無弗同。後則迥異。宋號瑤坡忘其名。

又 黃參

吉水羅循莆田吳希由同干支同登弘治己未進士官俱止憲副俱以癸巳卒。羅以四月吳以九月。但羅子洪先及第一人而吳子止廣文也。吳為四川憲副備兵威茂斬馘無算而羅或以陰德昌後耳。按貢舉考羅循陝西白河人三甲有羅倫乃吉水循當作倫以部本為正。元考云洪先父循亦誤。

又 黃增

余鄉有干支同者。惠安戴一俊與晉江周良賓同生嘉靖戊子年月日時無弗同者。戴以壬子癸丑聯第而周至甲子乙丑乃成進士。則遲十



二年也。然起家俱戶部，俱出守戴温州。周明州俱浙東，俱轉憲副，俱以守調簡同也。戴歸田之後，周始登第。周卒年六十一，戴年逾八十。戴有子亮，機舉癸卯。周有孫廷瑛，舉乙卯，則同而不同。不同而同也。又余友陳封君賓，與邑人王惟翰別駕同干支。王領丁卯鄉薦，而陳以是年舉觀察。亮采福澤壽考，復過之，豈自身科名與子孫榮膺亦互相虧盈耶。余同年洪方伯啓，膺與韓城薛方同生丙辰乙未辛丑丁酉同第。萬曆

壬辰同試政吏部，然洪舉乙酉，薛舉辛卯。洪由祠部郎督學兩浙，歷參知廉訪左右轄，皆在浙。薛以臨淮令擢民部調銓部，歷督勳考功文選。請告，洪亦以其年致政。薛後起太常少卿，丙辰不祿。洪亦以其年卒，封俱六十一同也。又星士連堪與余言，延平羅某與一同年某，同于支同第。某科進士，同授楚令，同行取羅得南刑部某。得南刑科情甚昵，晨夕過從，以厭會南中大疫，羅舉家死，凶略盡。羅亦染是病，幾殆，而某獨無

恙。每日輒來視羅羅。後疾稍可怪。某不來。詢之。則先一日死矣。蓋羅以園內代死。而某及其身。豈非命耶。因閱三命通會記樂善錄云。太學二士人同命。又同發解。約差遣相近。彼此知災福。後一選鄂州。授一選黃州。授黃州者死。鄂州者為襄事。祝曰。我與公同于支。出處同。公先我去。我即死。亦後七日矣。若有知幸。入我夢。以告。其夜果夢某來云。我生富貴。享受過。故死。公寒素。未享用。故活。後鄂州者官至典郡。以封終。則侯

約長年。奢溢損封。此又一徵也。又載家司徒懋官與申副使。佉命同。司徒死亂兵。申死牖下。而申先死。朱官保衡。李大參。廷龍。命同。朱第壬辰。李第癸丑。遲蚤差二十餘年。而官之崇卑。命之修短。又無論矣。萬侍郎案饒太守才命同。然萬成進士。饒止鄉舉。萬官鄉貳。饒止郡守。萬以謫戍死。而饒則否。饒多子。萬又少子。豈子孫官爵互為乘除。造物亦忌于多取耶。因并述之。以質知命之君子。

飲食

高帝不忘情于顏羹韓信不負諾于漂絮靈輒赴難以酬恩淵明乞食思冥報誰謂口腹之微無關心身之重

祈禱

武王疾而周公以身代聖人亦不能以命自安孔子病而子路以禱請賢者亦不免以神為侮是以聖人賢者作之于前愚夫愚婦惑之于後再拜

玉藻君酒肉之賜弗再拜子思於繆公餽鼎肉稽首再拜而受孟子亦曰以君命將之再拜稽首而受子思孟子先與禮拜矣毋怪後世之廢古禮也

諺

今人諺語皆本于古句法恒相類如掩耳偷鈴刺舟求劍坐井觀天抱薪救火守株待兔膠柱調瑟落井下石隔靴搔痒炊沙作飯見兔放鷹灼艾分痛臨寒索裘又如水中摸月佛面削金

管中窺豹。夢中說夢。屋下架屋。人皆常談。鮮有  
究其義者。

雅事 八則 俳諧附五則

山林公案

友人陳履吉云。山中何景最奇。曰。雨後露前。花  
朝雪夜。何事最奇。曰。釣同雀守。果遣猿收。華亭  
陳仲醇云。三月茶笋初肥。梅風未困。九月尊鱸  
正美。林酒初香。勝客晴窓出。古人法書名畫。焚  
香評賞。無過此時。二語足為山林公案。

睡訣

陸文量睡訣云。半酣酒。歎自宿。軟枕頭。煖益足。  
能息心。自瞑目。余不甚喜。睡嘗有訣云。俗事簡  
聲色。恬不怯冷。無苦炎。厚襯褥。低下簾。倦即臥。  
自黑甜。友人陳履吉云。手宋人陳編。輒自引寐。  
此山憲睡訣也。過矣。過矣。

煮茶

友人羅高君曰。山堂夜坐。汲泉煮茗。至水火相  
戰。儼聽松澗。傾瀉入杯。雲光瀲灩。此時幽趣。未

易與俗人言

奕棋

奕雖小技然日長一局是最清境界林君復生  
平極清至以着棋與擔糞并稱然風景矣不如  
楊廉夫云棋損向心畫為人役語和緩有致

缺冠

楊廉夫號鐵冠道人所戴缺冠重四錢六分向  
歲高大醫家陳眉公今收得之南其買缺冠時  
正在除夕前數日公私之逋蝟集猶抽力置此

足稱名士

竹如意箒冠

南齊明僧紹隱勞山詔徵不就賜竹根如意箒  
籜冠隱者以為榮

着裘帶帽

華亭孫雪居太守十月便以薪草縛柑桔上陳  
眉公曰此為木奴着裘余小園中喜種菊結苞  
時以龍眼殼罩之直至臘後放殼始開陳惟秦  
嘗戲余云此為菊花戴帽可為的對

種菜

宋宇種菜三十品。雨後按行園圃曰：天茁此徒。助余鼎俎。周顛曰：春初早韭，秋末晚菘。王維詩云：松下清齋折露葵。三君皆得農圃風味。此況未可與肉食肥漢道也。

客酬主

以下能諧

有人宴屠緯真酒酸，持杯勸曰：李白斗酒詩百篇，君非青蓮後身耶？緯真笑曰：令我能吸三斗。他日可宰相，其人悟而易酒。張幼子赴吳，令為

招酒酸幼子先以巨觥勸吳令，曰：主人未勸客，反勸主人，辭再三，幼子必勸主人飲，一入口，知其意，即易酒。

睡丞 黃參

張東海睡丞志云：嘉興丞某嘗訪一鄉貢，坐俟其出，輒睡。主人出，恐覺之，相對默坐，亦睡。丞覺不欲妨主睡，坐待又睡。主既覺，丞猶睡，不欲覺之，又睡，以待丞覺晚矣。主睡方酣，遂不交一語而去。余友沈從先吳人，亦善睡，嘗宿予齋，頭予

晨起有親故出殯往返七十里暮歸睡猶未覺也。黃云：余家從兄以塋王父母舉家送殯，留一僕守舍與之米，使自炊，三日歸則反扃其戶，呼之不應，竊意其鑿垣以遁，而四壁宛然，因斬關而入，猶在呻吟中，米仍未炊也。蓋睡兩晝夜，視沈更酣耳。

### 蹲鴟

顏氏家訓云：江南有一權貴，讀誤本蜀都賦，注解蹲鴟，芋也，乃為羊字，人饋羊肉，答書云：損惠。

蹲鴟舉朝驚駭。張九齡知蕭昊不學，故相調謔。一日送芋書稱蹲鴟，蕭答云：損芋拜嘉，惟蹲鴟未至耳。然僕家多怪，不願見此惡鳥也。九齡以書示客，滿座大笑。

### 君臣無鬚

李勣常疾，醫云：得龍鬚燒灰可療。太宗自剪鬚燒灰賜之，服訖而愈。李勣妙病，自為粥而燎其鬚，余嘗戲謂在杭曰：貞觀時君臣皆無美鬚，在抗說余無典故，余以勣事答之，一座絕倒。

判語諧謔

鄭安晚居青田府鹿食民稻犬噬殺之府囑守  
黥犬主幕官擬云鹿雖帶牌犬不識字殺某氏  
之大償鄭府之鹿足矣浙右有富人捨竹園于  
寺後其子貧甚取其笋僧執為盜聞于官守判  
云當初捨園指望福田既無福田還必竹園二  
事出隨隱漫錄亦足解頤又宋季偶嚴酒禁有  
婦首其姑藏私醞聞之官之判云姑誠有罪然  
為婦者宜代受杖遂杖其婦而遣之尤一快也

天象切輿 七則

赤雪

仙家有絳雪晉朝雜事云太康七年雨赤雪二  
頃唐五行志貞元二十一年正月雨赤雪于京  
師孫甫有論赤雪疏非祥兆也

甜雪

周穆王時西王母獻崦州甜雪見拾遺記

金馬碧雞 以下地輿

金馬碧雞二山在雲南神在成都漢遣王褒祀



金馬碧雞之神寔在蜀也蜀有碧雞坊薛澍曾居之

### 廬山

周武王時方輔先生與李老君跨白驢入山煉丹得道仙去惟廬存故名廬山又云周威烈王以安車逐匡續續仙去惟廬存因命其山為靖廬山邦人以先生姓呼匡山又曰匡阜

### 山川異聲

平涼有彈箏峽口水流風吹滴厓如彈箏之峽

韻金陵靈谷寺有琵琶街湖口有石鐘山武夷有鼓子峰皆山川之異聲也

### 武夷木樓

武夷鼓樓岩舊志云石樓四楹非也萬曆癸未五月陳孔震司馬憑陳羽士引至鼓子峯前鐘模石下緣石壁至其所見木造鼓樓一區高廣三四尺瓦甍皆以木窓牖戶牖皆具削甚精巧釘頭出木外四五分不知何代物傳云飛來或然也司馬至時不難及歸怖甚幾作昌黎華山

之慟程羽士力掖之始得下

呂梁洪行署之北山韞美石可為硯嘉靖初張鐘為主事分司其地始剖石製硯姚明山洙紀其事云此石負潤受墨不讓端歛徐州又有一種花斑石非此類也

國憲七則

國朝事勝前代

謝鐸云我太祖遠過于宋者五事一攘夷狄

以收服諸夏二肇基南服而一統天下三威加勝國而鋒刃不交四躬自勦業而臨御最久五申明祖訓而家法最嚴陸文量云本朝政體度越前代者數事公主寡不再擇壻中官有寵者賜袍帶不與朝臣并王公不敢擅殺人重臣任不得自辟下僚文廟不用塑像只用木主岳鎮海瀆之神不加封號文武官員不得挾妓眉公曰更有十事生員不許陳民間利弊九鎮鎮府以文臣為將天子自為居守閣臣六卿外廷會

推內廷不得專擅。母后不稱劄勳。戚不干政。皇子講官。即宮坊寮案。不立博望苑。不開天策府。無殉葬。不用黥刑。閹之刑。京師有執審者。直隸有減刑。非大典不輕赦。三品以上始蔭子入監。執袴不得濫朝籍。余日最善者不改元。官員落任不用謝表。大夫士庶俱戴網巾。不用團扇。用摺扇。濱海之地不運糧。選官惟進士舉貢。監吏不別南科目。此尤極便于官民。前代未有也。

國朝御寶

國初舊製表十七顆。皇帝奉天之寶。即傳璽也。兩郊大祀及聖節青詞。宮中用之。司官不與焉。皇帝之寶。詔赦用之。皇帝行寶。頒賜用之。皇帝信寶。徵戎伍用之。天子之寶。祀百神用之。天子行寶。冊封蠻夷用之。天子信寶。調番卒用之。皇帝尊親之寶。庶徵號用之。皇帝親之寶。展宗盟用之。廣運之寶。諭臣工。鈐號籍用之。制誥之寶。凡用之。制勅命之寶。凡勅用之。敬天勤之寶。飭覲吏用之。民

表章經史<sup>之</sup>寶 欽文之璽嘉靖十八年新制衣  
七顆 奉天承運大明天子寶 大明受命之  
寶 巡狩天下之寶 垂訓之寶 命德之寶  
討罪安民之寶 勅正萬民之寶 自皇帝之  
寶以下十五顆皆藏乾清宮 萬曆丙申宮燬移貯  
以下九顆皆藏乾清宮 萬曆丙申宮燬移貯  
文華殿內臣守之司官有時請用之訖仍輸於  
內

印文

內外諸司印文俱用篆以九畫為止字用成  
雙不及雙者足以之字而總兵所掛印文則用  
柳葉篆其五璽與王府之寶則用玉箸篆其印  
形方大小有差一品者三臺二品者二臺俱銀  
三品以下者銅惟應天府特賜銀印巡按御史  
鐵印柄端有孔條穿之其餘職衙門則形稍長  
不方謂之條記

永樂天順正德

南唐賊張遇賢宋方獵俱改元永樂遼述律號

天順皇帝宋西夏賊號正德我朝同此三號儒  
臣失考之過也甚矣宰相須用讀書人

周太祖十二樂

五代周太祖廣順元年邊蔚議改漢十二成為  
十二順之樂祭天神奏昭順之樂祭地祇奏寧  
順之樂祭宗廟奏肅順之樂登歌奠玉帛奏感  
順之樂皇帝行幸及臨軒奏治順之樂王公出  
入送文舞迎武舞奏忠順之樂皇帝食舉奏康  
順之樂皇帝受朝皇后入宮奏雍順之樂皇太

子軒懸出入奏溫順之樂正至皇帝禮會登歌  
奏禮順之樂郊廟俎入奏禮順之樂酌獻飲福  
奏福順之樂祭孔宣父齊太公降神同用禮順  
之樂三公升降及行同用忠順之樂享籍田同  
用寧順之樂今五代史無志故樂名闕焉十二  
樂見郭茂倩樂府定補史氏之缺

金花帖制

唐登進士有金花榜帖用塗金黃紙滴三寸長  
四寸大書姓名下有兩知舉花押仍用白紙作

大帖貯金花帖外亦書姓名二字蓋以此報其人也見崑山志

茶戶

北苑團茶盛于宋民編徭役名曰茶戶及至我朝久罷其貢而茶戶子孫年費數十金輸官多至破產歷洪武迄萬曆初無有議免其額者泰和郭公子章理建州廉得其狀請于兩臺蠲其稅夫團茶之貢久廢禍及茶戶十數代子孫無名橫征莫此為甚郭公初仕即能釐數百年積

弊真有寔政在民者不識當時丁蔡輸貢日民之苦又何如也

挾疑八則

孟子出妻

荀子言孟子惡敗而出其妻韓詩外傳言孟子欲出妻因母言而止二說不同書可盡信哉

高柴為武城宰黃參

人知子游為武城宰不知高柴亦為武城宰而化行民有不服其親者改之行喪如禮君子之

德風也。以身先之而民不遺其親。右見陶元亮  
士孝傳家語亦云。仕為武城宰。按檀弓云。成人  
為襄者。聞子羔將為武城宰。遂為  
襄。恐成未必為武城。或誤也。

子平

宋有徐子平。精星學術。士宗之。但稱曰子平。子  
平名居易。五季人。與麻衣道者同隱華山。今之  
推子平者。祖宋末徐彥昇。實非子平也。

積惡公忿

人有積惡。公忿莫可誰何者。著書人多厚誣之。

以快天下之忿。如秦始皇為呂不韋子。賈似道  
為凶婢。又謂其母遇賈涉。排而從之。又謂  
賈涉通饜婢。生似道。嫡不相容。賣為石匠妻。賧  
昧之事。誰其知之。奸暴過甚。後世并辱其母。是  
以君子惡居下流。

大姨夫

邵氏聞見錄云。歐陽文忠與王拱辰同為薛簡  
肅婿。文忠先娶長拱辰。娶其次。後文忠再娶其  
妹。故有舊女婿為新女婿。大姨夫作小姨夫之

戲余按歐公文集公初娶胥氏年十七卒繼娶  
楊氏年十八卒三娶薛高肅第四女偕老焉而  
王拱辰所娶者第三女也拱辰喪室又娶薛氏  
第五女則王為大姨夫非歐公也

太祖御像

長洲王錡寓圃雜記云吳故墟之西有天王堂  
其南廊土心像為劉總管所塑甚精絕永樂初  
襄陽圖僞為蘇州衛百戶偶覩此像即伏心泣  
人問其故答曰我高皇帝之容也蓋僞

侍 帝左右五年諦視甚熟故感泣耳自  
是遍傳吳中余以萬曆壬辰秋客吳友人錢允  
治與余遊吳故墟入一寺：前有土心端坐錢  
曰此我高皇帝像也余駭詢其故錢以  
前言對其塑像方面大耳隆隼豐額與今時所  
傳畫像大異近聞張民部萱疑耀云萱直西省  
始見內府所藏高成二祖御容  
高皇乃美丈夫也鬚髯皆如銀絲可數不甚修  
無所謂龍形虬髯十二黑子也 成祖貌



額環眼兩鬣橫分鬚長裘臍皆翼善冠衣綠不  
正立然則高皇之像蘇州天王堂土心  
所傳非謬矣吳黃暉蓬軒類記亦載天王堂事

玉璽圖說

天啓四年九月四日磁州東八里臨漳縣務本  
村漳河北岸有田夫邢姓者正畊野間瞥見異  
風數陣河岍攤塌聲震林木隨滾出黃白色物  
如斗大光芒陸離精彩奪目三尺許乃除去浮  
土得玉璽不敢自秘因呈本道按而驗之重一

百二十兩方各四寸面厚一寸二分螭龍鈕高  
一寸八分篆文曰受命于天既壽永昌於都懿  
哉余觀此寶埋光掩彩不知閱幾千年聖明  
在御遂獻禎符是天終不愛道地終不愛寶也  
所謂既壽永昌且為我皇上發之矧夫黃河  
澄清鳳皇來儀諸瑞畢至迺爾未有禎祥迭見  
如今日之盛者億萬斯年惟願皇上相傳若  
此敢不靖共厥位以輔受命于無疆哉分巡河  
北道副使齊東張夢鯨撰按南村輟耕錄云至

元三十一年甲午春正月太師國王之孫曰拾  
得者嘗官通政院事既歿家計窘極其妻脫脫  
真縈病一子九歲以玉質供朝夕及出玉印也  
取視色混青綠而玄光射人其方可尺四寸  
厚方之三背鈕盤螭四獸方際紐盡璽壚之上  
取中通一橫竅可徑二分舊貫以韋條面有象  
文八皆若虫鳥魚龍之狀其文曰受命于天既  
壽對永昌此傳國璽文也秦以和氏璧所造厥後  
有天下者寶之以君萬國御史楊桓率百官進

獻皇太后御前傳旨賜收玉之家楮幣三千五  
百貫御史中丞崔彧進傳國牋歷攷累朝傳授  
亡失之由見輟耕錄但篆文係鳥跡非若天啓  
四年臨漳所拾者也崔彧牋曰徽宗為金所虜  
凡有寶璽金皆取之因璽十有四青玉傳國璽  
一與至元所獻同則知南渡二百年無傳國璽  
也明矣天啓四年所獻璽與至元所獻大小不  
侔篆文亦異豈徽宗十四璽中之一乎記之以  
俟博古者

石鐘

湖口石鐘山。水經注以為水石相搏。若洪鐘。唐李渤以為潭上有雙石。聲清越。若鐘。蘇東坡親履水濱。聽風澗。鏜。遂非李說。千百年幾成聚訟。東坡好奇者也。又酈道元載之水經。可據。若李說。山石之響。宇內何處無之。鳥足以名。是山哉。

博聞 八則

瓦棺

人死藏魄于古禮也。金陵瓦棺僧事甚異。陸杜放翁筆記云。靖康丙午。臨邛夾門鎮山陰處。得瓦棺。長七尺。厚二寸。與木棺同骨。猶不壞。然則昔之以瓦為棺。不獨一僧也。

金蓮炬

金蓮炬送歸院。始于令狐綯。宋王珪。蘇軾。晁迥。史浩亦被此寵。今人但知蘇軾。

鍊硯

古人用鍊硯者。桑維翰也。洪崖先生欲歸河內。

舍人劉守璋贈以揚雄鍤硯以鍤為硯始自揚  
雄維翰効之耳

琵琶故事 黃參

琵琶故事烏孫公主王昭君潯陽高婦最著皆  
婦人也男子無聞黃云善才非男子乎

放龜

毛寶放龜事寔其軍人見寶本傳諸書誤以為  
寶相治不察寶守邾城石虎遣將攻城寶突圍  
出溺死江中

戮鱷

人但知韓文公能驅鱷魚遠徙而不知宋陳文  
惠堯佐詔縣吏操網捕鱷戮而烹之唐有鱷既  
徙至宋猶出食人文惠一戮之後不聞鱷再為  
患然則文惠之功在昌黎上矣文惠有自撰戮  
鱷文

放雀

徐別雲龍山有山人張天驥放雀亭山人有二  
雀甚馴且則望西山而放莫則望東山而歸蘇

子瞻為作記。今人但知林和靖孤山放雀亭。而天驥之名不著。特表出之。

### 捕蟬

今之緝子捕蟬。每用桃膠塗竹竿梢上。粘之即得。曹子建云。怪柔竿之冉。兮運微粘而我纏。欲翻飛而逾滯。兮知性命之長捐。蓋自古已然矣。

### 占驗 三則

#### 朱子前定數

義烏東平山有宋平昌刺史劉豪墓。隆慶戊辰長至。裔孫尚恭重脩墓碑。掘數尺。見墳臺。上有一磚。方尺許。刻晦菴卜墓數云。天聖戊辰墓此丘。蔭十八紀。出公侯子。子孫孫垂不替。繩繩武武永無休。五百四十一年。損十七八歲。裔孫脩戊辰。戊辰。新一石。重脩。重脩。千百秋。秘書郎朱熹書。按天聖戊辰。至隆慶戊辰。年數良是。而長至又恰戊辰。仍孫劉仕龍在宋。贈武節侯。脩墓裔果年十七歲。文公之數亦奇矣。劉之曾孫輝。

燻皆文公門人故為之卜而刺之墓

是司空夢

新建吳司空桂芳未第時至鯉湖禱夢仙書云  
蘭陵美酒賞心樂事功蓋天下澤及萬民公密  
記之人尚夢只以前兩句對及登第出守揚州  
蒞任之日見酒肆中懸一招牌則前兩句憬然  
有悟但後兩句未驟耳後公累官漕運總督經  
畧淮海晉工部尚書以勞瘁卒贈太子少保副  
云功蓋天下澤及萬民乃歿後始驗也

水去就好

莘亭曹別駕藩為諸生日禱于鯉湖夢一童子  
云君榜上已有名但水去就好甲午試北畿從  
南河入京竟不第迨丁酉歲焦弱侯為考官錄  
其文魁禮經寫榜人誤書藩字作蕃所謂水去  
之應也別駕與余言

醫學四則

楊氏平脈

南齊褚澄精于醫著書十篇刻石殉葬後盜發

其塚書傳人間第三篇平脈言女子肺脾命在  
左心肝腎在與今人診脈殊異錄之備攷

### 學鑿五難

祝允明云病家貴驕不肯敬從一也病人愚悞  
強謂自知不能服從二也愚下之輩不辨良庸  
有劣工謬得俗譽愚下必棄上匠而委劣工  
三也劣繆之徒信其妄施偶中他力自執為是  
四也良雖薦藥服者他參用而復疑愈不專工  
敗乃分謗五也

### 喉閉藥

喉閉之疾用鴨嘴搥調釀醋灌之即吐膠痰見  
癸辛雜志

### 稀痘方

王損菴筆塵云姑蘇有一僧賣稀痘藥服之神  
驗王荆石相公許以重利欲傳其方峻拒之後  
以十金得之於其徒乃玄參兔絲子二味等分  
蜜調服也公欲廣其澤見人即說後罕驗蓋秘  
方廣傳則不効人莫喻其理王先生曰衆生業

力大製方者心力幾何不能轉之故也予謂古  
方療病今人多不驗痘瘡五年一發或特年宜  
用涼用溫未可執一而治予幼年見函中治痘  
什九用參耆近年用補者死多用涼劑此可以  
破其說矣

靈異

十一則

附果報四則

阿育王塔

四明鄞山阿育王塔晉太康三年從地湧出其  
狀青色似石非石高一尺四寸方廣七寸露盤

五層四角挺然中懸金色小鐘舍利綴于鐘下  
圓轉不定繞塔四周俱是鏤空諸佛菩薩金剛  
聖僧八部等像神工聖迹非人力所及萬曆丙  
子平湖陸五臺公瞻禮初見舍利大如芡實已  
如彈丸已大如瓜最後大如車輪五色變幻光  
彩射目壬子泰和郭孔泰孔陵到山瞻禮舍利  
初視若黍珠已如豆如蓮子同觀者或見如新  
菱出殼兩角垂絲綴以珠或見如葡萄色或  
見如桃瓣或見如金蓮花瑞相種種莫可殫述



始知佛大神通歷千百年不滅也。

金雞

武夷接筍道士程應玄者曾入金雞下洞從舟中仰視洞若不甚深廣所堆木若有限比履其所甚宏邃內有三丈餘楠木上閣仙蛻十三函每函頭顱一二片脛骨一二莖手骨一二節皆裹以錦帕一函中有霍骨頭與足各一又有楠木刻一舟長丈餘滴三尺內細羅香末并香灰幾滿而洞中香灰成堆者亦壘之然上金雞洞

視下洞為小人不敢到萬曆丁丑五月有張富郎者年八十餘冒險入其中則見數人鼾睡香灰內傍有銅磬覆如富郎翻而視之磬下一雞遽展翼鼓扇香灰眯目富皇俯伏半晌稍息亟由籃緹下半空竹籃掀富郎墜入舟子懷中無恙後年九十終應玄親見富郎道其詳陳司馬又親見應玄紀其實。

金雞洞香爐

武夷金雞洞舊志云嘉靖甲午飛來鍊香爐可

三百斤。成御史李元陽作記謂洞中見新置戍一物如香奩狀。丹朱燁々約方六七尺。侍御先一日望洞中無有。次日乃有見。洞在二十仞之上下臨不測。何一宿之頃能致之速耶。據此二說則洞中飛來者先為香爐。後飛者不知何物也。邇年陳司馬孔震記云。只見洞倚小石岩中有一爐若盤盂而不見。所謂六七尺及三百斤者豈變幻無常耶。

石鏡

高州府城有洗夫人廟。祀梁太守馮寶妻。廟前古碑一通。厚可尺餘。有石鏡一點。白色。形類暮子。通明瑩徹。視之可見。後殿屋宇器物。余幼游高涼及壯所見異物。僅此耳。

蛇精蟒精

范鎮東齋記事云。蔡君謨知福州。疾不視事者累日。夜夢登鼓樓。馮鼓而睡。通判有怪。鼓角將累日不打。三更者因對數夜。有大蛇盤據鼓上。君謨既愈。與通判言所夢。正與鼓角將所說同。

遂以君謨為蛇精。米襄陽志林云：米知無為軍，嘗呼譙門鼓吏曰：夜來三更不聞鼓聲，吏言有巨白蛇纏繞其鼓，故不敢近。米領之，叱吏去，不復向。故郡人疑其蟒精。

朱晦庵魏霍山

宋咸淳間蜀人彭澹軒罷江東倅遊武夷山，嘗獨行林藪，入草菴中見二士夫，我冠博帶對食，招彭坐，俎中豕首一羊肺一雞，一所言皆先天圖易傳性理之學，玄妙深奧不可曉。彭問其姓，

字右坐者曰：姓魏，山林野叟，無字可稱。向左坐者不答，日暮辭出。彭明日携僕挈榼再往，無徑可達。下山至一富家，言所以，富家曰：異哉！昨日至朱祠，致祭，正俎中之肴，方悟左者朱晦翁，右者魏霍山也。此段載異聞總錄，可備武夷山志之缺。

人異

成化間漳平縣有朱孔良家婦懷孕三年乃生子，子生即轉身行步，三日升樓而去，彌月復來。

又去週歲復來自斷髮為一結取小匣盛之與  
母別曰數十年髮解則吾復生遂去不復來矣  
正德間母猶存發視之結如故絕無影鄉音邑志  
載此事亦大異也

鱉異

錢塘張尚書曾孫某典簿堯恩之子也。有塘栖  
呂氏饒張活鱉張付烹魚俄聞釜中有慨嘆聲  
張異之取視而鱉斃矣剖其腹中有人長二寸  
眉目口鼻肢體手足無一不具跣趺坐蓮花上

金中丞公子魯親見之為余言時萬曆戊申年  
也

龜異

孫太初居南屏山時養一龜後去道場山遺龜  
于南屏僧寺孫化十數年僧明鏡夢青衣人求  
救曰某孫太初伴也願師明晨索我于花臺之  
下僧寤往發得一龜徑尺為石所壓其筒半裂  
而蛆叢集僧欲瘞之越夕不知所往然歲聞  
其聲耳至今不絕

魚異

仁和張向渠者家寧元洲之兒也母陳畜朱魚二十餘頭玩弄日久母歿向渠哀毀不忍往視皆變為白群客聚咸謂魚常變色血異也此觀及去喪之日魚復變赤儼同除喪人謂孝感所致

金字牌

萬曆己酉五月十四日揚子江心風浪大作有渡船載百餘人幾覆忽見浪中有鬼面者持一

牌起書金字一字衆謂必有金姓者在舟當死果有姓金者一人衆欲推之入水金本持齋誦經乃曰若活衆命吾何惜死然數止此安能倖免乃躍入水中時風狂舟速金彷彿若有人扶之者巨浪送上郭璞墓塚而立見舟顛覆俱溺死獨金得生江右劉觀南觀察親見其事

鼃蟒 以下果報

趙昭儀既死趙后夢中見帝尚昭儀何在帝曰以數殺吾子今罰為巨鼃居北海之陰水穴向

受千歲水寒之苦。後北鄙大月王獵于海上。見  
巨龜出于波上。首猶貫玉釵。有戀人之意。大月  
王遣使向梁武帝。武帝以昭儀之事答之。武帝  
后郝氏崩。數月。帝常追悼之。一夕。甫寢。殿外騷  
窣聲視之。乃見一蟒盤踞上殿。睜睛張口。向帝  
帝大驚。蛇為人語曰。蟒則毒郝氏也。以生存嫉  
妒六宮。其性慘毒。罪謫為蟒耳。無飲食可實口。  
無穴窟可庇身。又鱗甲有虫。咬嚙肌肉。痛苦若  
加錐刀焉。感帝平昔眷妾之厚。故託醜形。祈一

功德拯救也。以妃嬪之尊。一旦嫉妬。則罰為龜  
為蟒。今之殘忍妒婦。亦將來之龜蟒耳。二事須  
頒行。以警長吉。

### 犬異

錢唐江氏過淨慈寺。歸夢其亡婿卜四為寺之  
堆雲菴犬。自言生前為嘉定徐氏子。因負寺債。  
遂墮狗胎。于茲三年。願丈人為懺除之。明發江  
氏至寺。見犬大慟。呼曰。卜四官何以至是。犬淚  
下。搖尾隨江氏去。萬曆壬寅年。事僧大齋。為余

言

毀佛

魏在渠毀佛。搥碎六祖遺鉢。折寺院無數。後嗣之絕。聶雙江毀寺。亦無嗣。誰云佛無報應哉。

雷震毀寺

蜀成都府彭縣有寂光寺。廣袤五六里。香火甚盛。其地有縉紳劉志淵者。垂涎梵宇。可拓私居。斥逐僧流。毀除佛像。方埋佛入地。忽霹靂一聲。震志淵立斃。身首異處。後有邊司徒之子丁范。

破產恢復。再建叢林。劉氏子復爭之。事在萬曆庚子辛丑間。時傳金沙張芝陽。俱為蜀憲。倡義重興焉。

珍玩 七則

火玉

唐武宗時。夫餘國貢火玉。光照數十步。積之可以然鼎。實室內。不必挾纒。古所無也。

窰變

庫

饒州府學神庫中。有窰變香爐一。花瓶二。相傳

舊為同青所畫變成赤色。今花紋或淡或濃宛然錦繡。上署永樂四年造。但神爐非玩器也。

### 宋硯

三十年前吾鄉宋硯最多。人不知重。故家收藏與凡硯等。余目擊宋硯不下百數。二十年間轉鬻吳越殆盡。蓋鄉人利其厚值故也。余友林熙本家藏一硯。石質完好。背刻嘉佑御賜鄭穆六字。林得于鄭之子孫。真世寶也。穆字肉中侯。官人。吾館尚三十年。官至祭酒。尚先達也。此硯款

識宛然。當為吾鄉第一。

### 流黃劍

上元夫人佩流黃劍。會王母於漢武宮中。

### 軟倭刀

嘉靖中胡總劄宗憲有軟倭刀。長七尺。出鞘地上卷之。詰曲如盤蛇。舒之則勁自若。唐天寶時有軟玉鞭。光可鑑物。屈之則如環。伸之則如繩。亦異國所獻。鍊玉最堅剛之物。能屈伸之。理之不可曉者。



鵲尾爐

費寧先信佛法以鵲尾香爐置膝前陶負白有金鵲尾香爐

料絲燈

料絲出滇金齒者勝詢之士人云以瑪瑙紫石英諸藥品搗為屑煮腐如粉然必市北方天花菜點之方凝即縲為絲織如絹狀上繪山水人物諸色極晶瑩可愛以煮料為緣故名料絲

花卉果木 十三則

桃花故事

謝在杭文海披沙徵芙蓉事極多謂他不能稱是予以桃花為名亦甚夥因列于後

桃花源武陵桃花渡四明桃花雨天寶中兩如

之馬嵬桃花水三月桃花浪杜詩三月桃花醋

唐世變風俗貴葫桃花海桃花蹊

蘆油在書翻桃花馬桃花梗南穀

桃花石在定海桃山桃花期桃花扇

桃花帳 桃花縵出漢宮儀名桃花信毒桃

花米 宋武帝張妃事 桃花廩 貴妃事 桃花妝 貴妃事 南桃  
 花酒 色酒漬桃 桃花觀 在云都觀 桃花犬 宋太宗厚化  
 桃花灘 在貴 桃花觀 在云都觀 桃花面 花人相映  
 護詩 紅雀 桃花賦 休日 桃花岩 武在邵 桃花洞 在杭  
 桃花精 人特異記紅衣 桃花嶺 海州泥裡 桃花核 判  
 拋嶺上 二錦 桃花舖 安慶太 桃花腹 咸池 桃花  
 腮 桃 桃花塢 杭別阜亭山 桃花簌 咸池 桃花  
 犬 山西廉使趙澤民 桃花偈 志勤 桃花汗 貴  
 桃花井 種師曠聞天老曰井上不祥 桃花廳 梅在許別  
 梅花 聖俞

有桃花絲 青齊間 桃花 織鞋履雲仙雜記 桃花  
 詩 桃花紅守宮塗臂而 桃花夫人 見杜牧詩 桃花  
 名 桃花寺見宋趙 桃花夫人 見杜牧詩 桃花  
 茶 東坡詩向木茶 桃花夫人 見杜牧詩 桃花  
 凌霄金錢 錢

凌霄花金錢花皆有毒不宜近眼花露入眼則  
 失明

刺桐

嶺南異物志曰刺桐南海至福州皆有之叢生

繁茂唐陳去疾家于函郡因言方物云刺桐葉  
綠花紅今泉州名刺桐城問之泉人亦云不識  
此樹何狀福州蓋未之見矣

枸杞

枸杞續仙傳朱孺子見二犬入杞叢下異之乃  
尋掘得二杞根形如火故名枸杞杜子美以狗  
杞對雞栖甫樂天詩云不知靈藥根成狗怪得  
時聞夜吠聲後世方書皆曰枸杞誤也

大茶

天台記丹丘出大茶服之生羽翼又蒙山頂茶  
一服祛疾二服無病三服換骨四服即為神仙  
故盧仝歌云既覺兩腋習清風生蓬萊山在  
何處玉川子乘此欲歸去皆有所據非漫語也

異草

善語國有草食之令人不服名却睡草洞冥興記  
度比南有草紫葉而香醉者嗅之即醒名醒醉  
草開元常山有草置諸門夜有人過輒叱之名  
護門草酉陽東海祖洲有草人死三日覆之即活

一株可活一人。名不死草。十洲記瓊洲有草。視其節。知一歲。凡候名。知風草。一統志黃帝時有草。生于庭。佞人入。則指之。名指佞草。佛覽漢武帝時。異國獻草。似蒲。帝思李夫人。懷此草。輒夢見之。名懷夢草。酉陽

禹餘糧

張華博物志曰。扶海川上有草。名薜。其實食之。如大麥。七月熟。民斂之。至冬乃訖。名自然穀。或曰禹餘糧。唐詩云。澗有堯時韭。山餘禹月糧。

嘉客紅

宋福清翁昭文先儒元從子也。圃中非時生荔。支其母曰。豈有嘉客踵門耶。頃之莆田林光朝至。因名為嘉客紅。可補荔譜之缺。

龍荔

交南有一種龍荔。實如小荔枝。味如龍眼。木與葉亦類。閩廣陳剛中詩云。龍荔綴如珠。

三寸柑

凡柑皆圓。獨成都產者。形如鴨卵。故杜甫詩云。

三寸黃柑猶自青三寸言其長也余嘗過臨江府地產黃柑有長三寸者

嘉慶子

唐韋述兩京記東都嘉慶坊有李樹極美故稱嘉慶李千百年後稱李乾皆曰嘉慶子似物未有如此之得名悠久也

丹青樹

西京雜記云終南山有合離樹紅綠相雜班駁如錦繡長安謂之丹青樹

蚊樹

嶺南異物志曰有樹如冬青實生枝間如枇杷每熟卽坼裂蚊子群飛惟皮殼而已名蚊子樹今永福山中有之鄉人為余言

鳥獸象魚

六則

鳥非不祥

鳥惡鳥也人聞其鳴輒為不祥昔謝艾鳥鳴牙旗乃兆軍勝張率更鳥鳴庭樹乃兆授官唐韋顥將放榜日鳥鳴簷際逐之復還顥曰我失意

無所恨。兼恐橫罹災患。須臾榜出。顯登第。然則  
鳥非惡鳥也。

念佛鳥

九華山產念佛鳥。形大如鳩。色黃褐。翠碧向而  
成文。音韻清滑。如誦佛聲。唐韋蟾詩云。靜聽林  
飛念佛鳥。細看壁畫馭經馬。

龍九子

龍生九子。所載不同。一曰蒲牢。好鳴鐘。鈕之獸。  
囚牛。好音。樂器之獸。蚩珠。好吞。殿脊之獸。嘲風。

好險。殿角之獸。睚眦。好殺。刀頭之獸。負屭。好文。  
碑旁之獸。狴犴。好訟。獄門之獸。狻猊。好坐。佛座  
之獸。霸下。好重。碑座之獸。又云。瓦猫。好險。簷前  
獸。饕餮。好水。橋下獸。螭。好慵。門前獸。憲章。好  
囚。獄門獸。蜥蜴。好腥。刀頭獸。蒲牢。霸下。負屭。唾  
吻。與前同。

猫


猫之善捕鼠者。日常睡。終日跳擲者。必不捕鼠。  
見陳正齋集。猫不捕鼠者。名麒麟猫。有。

鮫魚皮

吾國產銅。鑄刀劍甲天下。劍鞘以鮫魚皮為鑲之。堅硬如石。海中有魚名鮫魚。或以為鱸魚皮。非也。李長吉劍子歌云。鮫鮎皮。老蒺藜刺。鷓鴣。萍花白鷗尾。正指此也。魚皮隱起細刺。如蒺藜。故云。

鹽車螯蟻

閩中產鹽。見韓退之詩。車螯見歐陽永叔詩。蟻見蘇子瞻詩。



卷八終

